



kat.komp.

17768

I

Mag. St. Dr.

P

Dux in

Alex. Oratio panegyrica

Illmo Principi Sarmatis Duci in Ostrog  
dicata.

PANEG. et VITAE

Polon.

4<sup>o</sup>

№. 660.

Biblioteka Jagiellońska



stdr0002309



# ORATIO

PANEGYRICA,

*Illustrissimo Principi ac Domino, D.*

IANVSSIO DVCI

IN OSTROG. COMITI IN

Tarnow, Castella: Cracouiē:

Włodimirieñ: Cercassieñ:

Bialocerkieuiē: Bohuslauieñ. &c. &c.

Capitano Domino, D. Patrono  
suo clementissimo.



Ab

ALEXANDRO MELCHIOROWIC

*Artium & Philosophiæ Baccalaureo,*

DICATA.

VI. Idus Februarij, Anno salutis,

M. DC. XIII.

CRACOVIAE. *Apud Simonem Kempinium.*





IN ARMA:  
*Illustriſſimorum Ducum Ostrogiorum.*



BELLIGER hisce tuos ataus insignibus auxit  
 Hostibus euictis dum nituere nece.  
 An non hi sauos cuneos strauere Getharum?  
 Mystacas an non his, canna sinistra scidit?  
 Hæc ego quid memoro, testantur auita trophæa,  
 Quæ studio virtus, ardua semper adiit.  
 Nec te degenerem dextra & belli arguat vnquam,  
 Hæc cum te decorent, st,mmata clara Ducum.



*Illustrissimo Principi Domino,*

D. IANVSSIO, DVCI  
IN OSTROG, COMITI IN  
Tarnow, Castellano Craco.

uieñ: Wlodimirieñ: Cercassieñ: Peresla-

uieñ: &c. &c. Dño D. Mecenati  
suo colendissimo.

S. P. D.



MNES HOC HABEMVS à NA-  
tura insitum, Ill<sup>me</sup> Princeps, vt eos à qui-  
bus beneficia accepimus, amemus, colamus,  
ac veneremur. Et non iniuria. Nullum e-  
nim mortales vitium maius esse arbitrantur, quàm dum  
ingrati animi notam aliquis incurrit; nullum scelus a-  
trocius esse putant, quàm dum ingratum esse alicui obji-  
citur, ex quo omnia scelera in genus humanum pleno al-  
ueo feruntur. Quid enim est ingratitudo, quàm impie-  
tas orta ex obliuione accepti beneficij? cum vel collati  
beneficij immemores sumus, vel inuiti gratiam referi-  
mus, vel cum (quod omnium est pessimum) pro libera-  
litate & beneficentia maleficia reddimus. Quod ego  
dum penitiùs mecum perpendo, inhumanum profectò ac  
impium, maximeq; contra naturam eum peccare, qui  
tam teterrimi mali labem incurrat, ratus, semper id de-  
fixum in mente habebam, vt Ill<sup>ma</sup> Cuius Tuæ meritis er-



ga me singularibus aliqua ex parte gratias referrem :  
cumq; id beneficia ab I. C. Tua præstita , à me expostu-  
lent ; totum cursum vitæ meæ eò dirigendum curavi , vt  
quacunque ratione possem heroicas , ac propè Diuinas  
virtutes I. C. Tuæ omni genere monumentorum , non mo-  
dò hac opellâ quæ est perexigua , nam ab adolescente pro-  
ficiscitur , sed quàm maxima posthac si Deus O. M. con-  
ceßerit immortalis posteritatis memoriæ consecrarem.  
Non quòd rerum ab I. C. Tuæ gestarum gloria hoc tenui  
satis ac leui testimonio indigeat : sed quòd alia mihi nul-  
la via relinquitur , quâ ingrati animi notam effugere  
valeam. Quapropter alij quidem , quibus est vberior do-  
ctrinæ copia , I. C. Tuæ maiora atq; grauiora offerent.  
Ego autem qui vix primis ( vt aiunt ) labris studia de-  
gustavi , à quo nihil egregium ac dignum I. C. Tua expe-  
ctari potest ; scribam tamen qualiacunq; potero : & hoc  
quàm leui testimonio omnibus , erga I. C. Tuam gratum  
ac memorem animum meum , testabor ; iamq; modo tes-  
tor , meq; totum I. C. Tuæ quod solum habeo , dono , do,  
dico , deuoueo. Supplex autem peto , vt æquo animo , vt  
solet I. C. Tua hoc munusculum leue à me , hilariq; & se-  
reno vultu suscipiat , legat , & amplectatur , neq; tam  
quid amplitudini I. C. Tuæ conueniat , quàm quid præ-  
stari à me possit I. C. Tua expendat. Vale meum decus ,  
studiorūq; Patrone. Datum Crac: 6. Id: Feb. Anno 1613.

Illustrissimæ Celsit: Tuæ  
Cliens,

Alexander Melchiorovic, A. & P. Bac.



## ORATIO PANEGYRICA.

**E**T si neminem reperiri arbitror, qui nesciat quàm sit difficile, & onerosum iudicio quidpiam, & censuræ committere virorum gravissimorum; qui Catonem illum censorem rigidissimum præferant, lynceisq; oculis omnia perspiciant: difficilius tamen prælo aliquid dare, & in aspectû lucemq; hominum doctissimorum proferre, iudico. Etenim si pictores imagines suas, quas vnus angulus capere potest, lucidissimis coloribus noctes diesq; inuigilantes condecorant: multò magis eos elaborare, qui literarum monumentis quidpiam consecrare, atq; in lucem proferre volunt, (quod totus orbis audiat, legat, & admiretur) conuenit. Vt nihil sit penè, quòd non lychnum & lucernam Demosthenis redoleat: nihil quòd nō præmeditatum domi, perfectum ingenio, elaboratum & excultum omni lepore atq; exornatum esse videatur. Cur ita? Omnes enim sibi videntur esse belli, sibi docti, sibi pulchri, sibi sapientes: omnes philtro quodam venenati sua laudant, aliena respuunt, & Theonino dente rodunt; omnes manticas, quæ sunt à fronte non quæ à tergo, respiciunt. Multi tamen reperti sunt, qui hominum improborum diçteria minimè veriti, priuatum commodum publico postponentes, totas noctes diesq; desudarunt, totumq; flo-



rem ætatis suæ ad hoc vnum tanquam ad Cynosuram & Helicen direxerūt; vt posteritati & Reipub. prodesse, suisq; scriptis ad res præclaras alios incitare possent. Neq; enim tot vnquam Reges aut Imperatores fortissimi extitissent, qui in tantas dimicationes, atq; in tantos profligatorum hominum quotidianos impetus patriæ ergo sese obiiicerent, nisi animus eorum in posterum præsentiret, non cum vitæ tempore dimittendam commemorationem nominis sui, sed cum omni posteritate adæquandam esse. Nullam siquidem virtus mercedem laborum periculorumq; desiderat, præter hanc laudis & gloriæ; quarum gratia omnes labores, frigora, æstus, cruciatus corporis, omnia deniq; pericula mortis, atq; exilij floccipenduntur. Quæ omnia in tenebris iacerent, nisi viri sapientes literarum lumen accenderent, quod nulla vnquam dies extinguere posset. His ego studiis cum à pueritia ipsa ab Illustriss: IANVSSIO, Duce in Ostrog traditus essem, hoc vnum semper cordi habui, vt aliquando tantorum beneficiorum Principis mei Clementissimi, animi saltem memoris quodpiam indicium darem. Sed cum tot & tantas virtutes in ipso conspiciam, quod ingenium tam sublime erit? in quo tantum flumen verborum, aut tanta vis & vt ita dicam fulmen sententiarū appareat, quod minimam ipsius laudum



laudum partem commemorando reconfere que-  
at? Quid igitur faciendum est? Silere an aliquid  
dicere debeam, ambigo. Dicam? at nulla est mi-  
hi dicendi maiestas, quæ ipsius facta enumerare  
valeat? Sileam? at ingratisissimus ero, si tantorum  
beneficiorum quæ mihi plena manu contulit, im-  
memorem me exhibeam. Dicam igitur quàm  
potero brevissimè. Vicit enim timorem huma-  
nitas, vicit pudorem subrusticum liberalitas, &  
magnificèntia, ac in bonas literas magna propen-  
sio. Dicam autem quanquam eo apparatu, quem  
dignitas rei postulat non valeo; tamen vt & ego  
profectum studiorum meorum pericliter, & ille  
fructū aliquem sumptus sui, quem mihi hucusq;  
suppeditat, percipiat. Rem magni nominis, ma-  
gnum exemplar, gloriæ, admirationisq; plenissi-  
mum, aggredior. Tu ipse Illustriss. Princeps, quæ-  
cunq; à me dicentur bonam in partem accipito,  
vt me ad maiora contendētem beneuolentiæ au-  
ra subuehas & promoueas. Dicam igitur quātum  
vires ingenij fuerint, primò de factis illius illustri-  
bus & meritis in Rempub. secundo de magnifi-  
centia: postremo de liberalitate incredibili in e-  
genos. Atq; vt inde oratio mea proficiscatur, vn-  
de totum orationis genus manasse videtur; fa-  
milia eius clarissima, ortum suum ab eadem ori-  
gine, ex qua Lechitæ florentissimi & bellicosissi-  
mi hu-



mi huius regni primi Autores prodiere, ducit.  
Nam Russo, fratri Lechi, Polonorum primi Du-  
cis, hæc regio quæ nunc Russia dicitur, sorte o-  
blata est, quam ille non minus feliciter, quàm Le-  
chus Poloniam; condidit, rexit, factisq; illustribus  
cōdecorauit. Reuoluenda essent monumēta Po-  
lonorū, Suecorum, Italogum, Bohemorum, Mo-  
schorum, Prutenorum, quibus in gentibus nullus  
est adeò hospes, cui nomen Ostrogianum non sit  
clarum, stupendum, & admirabile, ut iure meritò  
Ostrogia ( quæ est totius Podoliæ decus & Asy-  
lum) ab omnibus suspici, laudari & prædicari de-  
beat. Quid enim si Leopoldis omnibus gentibus  
est admirationi, quod nomen insigne à Condi-  
tore suo Leone Imperatore acceperit, sitq; ad o-  
mnia pericula Reipub. Polonæ propulsanda, ceu  
leo fortissimus. Et ut cum Pòeta loquar.

*Ille velut pelagi rupes immota resistit,*

*Ut pelagi rupes magno veniente fragore :*

*Quæ sese multis circum latrantibus undis*

*Mole tenet, scopuli necquicquam & flumina circum*

*Saxa fremunt, lateriq; illisa refunditur alga.*

Quid si Zamosciam laudamus, quæ Imperatore  
fortissimo Zamoscio patriæ amantissimo gloria-  
tur; qui scutum Polonorum, hostiumq; fulgur  
appellatus est: qui felicissimè se penumero in-  
gentes Turcarum exercitus exigua manu cecidit,  
Scythæ-



Scytharum agminâ prostravit, Valachorum tur-  
mas fudit, Suecorû legiones profligavit, Germa-  
norum phalanges deleuit, Moschorum oppida  
munitissima ferro & igni expugnauit, diruit, va-  
stauit, multa; millia virorû orco immerfit. Quid  
si Cracouiam quòd cognomen suum à Craco sor-  
tiatur prædicamus, quæ est omnium disciplina-  
rum mater & altrix, ad quam veluti Athenas ( in  
quibus domicilium suum Musas fixisse alitamq;  
rationem esse credidit antiquitas ) vndiq; natio-  
nes confluunt? Nonne Ostrogia omnibus his fe-  
licior atq; illustrior est, ex quâ tot ac tales Princi-  
pes benignissimi, Senatores prudentissimi, Impe-  
ratoresq; fortissimi, tanquam ex Oceano proflu-  
xerunt, aut equo Traiano prodierunt? Ex quo-  
rum numero est IANVSSIVS, qui & apud  
suos in amore, & apud externos est in honore; de  
quo aliqua dicturus nō possum sicco (vt dicitur)  
pede, parêtes, auos, atauosq; eius præterire. Quid  
enim est laudabilius, quàm maiorum clarissimo-  
rum gestis similem apparere? Quid optabilius,  
quàm ex illustribus parentibus ortum, eorum esse  
non degenerem? Quid præclariùs, quàm ab auis  
atauisq; Ducibus bellicosissimis fortem nasci? vt  
enim è corruptis seminibus vitiosæ fruges, sic à  
malâ radice mali furculi, à bonâ laudabiles pul-  
lulant. Vnde non ineleganter quidam.



*Sæpe patris mores imitatur filius infans*

*Qualis erat mater, filia talis erit.*

Et non immeritò. Nam quemadmodum in equis generositatem & dignitatem soboli adfert patrum generosus animus aut firma latera, aut pernicitas, aut pulchritudo: in arborib<sup>9</sup> ille plerunq; laudantur, quæ optimis ex seminibus coaluerunt: ita in hominibus claris esse parentibus genitum semper pulcherrimum atq; honestissimum fuit. Ut enim Venusinus Pòëta ait.

*Fortes creantur fortibus & bonis*

*Est in iuencis, est in equis patrum*

*Virtus, nec imbellem feroces*

*Progenerant aquillæ columbam.*

Quid igitur dicam de parentibus eius, qui pacis & belli temporibus regnum hoc felicissimum viribus & consiliis ceu Atlas cælum humeris sustinebant, ac fulciebāt. Quorum alij patriam omnium charissimā, è seruitute fædissimā, ac planè ex faucibus hostium eripuerunt, iucundæq; libertati & honori pristino restituerunt; multi terminos & fines imperij longè lateq; extenderunt, auxerunt, propagarunt; plurimi confines & socios Polonorum labantes, iam iamq; ad hostes desciscientes confirmarunt, erexerunt, lapsisq; manum supponentes à perniciæ & ruinâ vindicarunt; ut eos taceam, qui vitam nulli nō iucundā profunderent, mo-

re, modò patriam saluam ac incolumem conseruarent, non dubitarunt: nec eos commemoro qui primò omnium religio nem veram Christi in oras Russiæ attulerunt. Sileo quoq; bella quæ cum potentissimis Moschis, ferocissimis Tartaris, acerrimis Valachis, Turcis deniq; vel ipsa victoriarû perpetuitate formidabilibus gesserunt: quarum gentium validos sæpenumerò exercitus profligarunt, regionesq; ipsas impunè vastarunt, domuerunt, ditioniq; suæ adiecerunt. Atq; vt à Tartaris perpetuis nostris hostibus ordiar, horum tres exercitus fortissimos apud Sluscû tribus præliis, auus illius Constantinus, felicissimus quondam Imperator, Sigismundo primo Poloniæ Rege, ad internecionem cæcidit. Deinde ad Visnouéciam viginti quatuor millia, cum se per fines Russiæ populabundi diffudissent, felicissime profligauit, cum suus miles numerum sex millium non excederet, de quibus (quis credat) vix centum amissi sunt; hostium verò innumera strages facta est, vt vix pauci pernici fuga euaderent: quæ magna quidem sunt; sed leuissima præ his quæ gestit animus dicere, quæ sciens volensq; vt multa alia prætereo. Quid enim illam ad Canouiam in Lituania ingentem cladem memorem? quâ viginti sex millia Scytharû parua manu prostrauit? Quid de Moschis aliisq; nationibus loquar? cum hæc



lippiis (vt dicitur) & tonforibus nota sint. Longum esset dicere, quot Reges magnarum gentium fugauerit; longius quot manu suâ occiderit; longissimum quot armorum sit quæ ipse fugatis hostibus, dirutis vrbiû mænibus, expugnatis munitissimis naturâ loci atq; artis manu, arcibus ceperit. Enimuerò quæ mundi pars est, ad quam fama ipsius non penetrarit? Testis est Moldauia, quam ipse plurimis præliis compescuerat: testis Liuonia, quam è faucibus hostis barbari multoties eripuerat: testis Scytharum exercitus, quem sæpissime ceciderat: testis Valachia & Turcarum gens, aliq; barbari qui ad ipsius nomen tremebant: testis quoq; Starodubum, Olsa, & aliæ munitissimæ vrbes ipsius virtutis: testis ipsa Mosqua totius Moschouiæ Metropolis, quam tot præliis adeò oppugnauerat, vt semel fractos spiritus nequaquam posthac recuperare posset, sed audito nomine Constantini exhorruerat. Neq; iniuriâ. Semper etenim prudentia & consilio, non minus quàm viribus, aut velocitate corporû res magnas gerebat. Nihil ille attentare, priusquam deliberasset: nihil aggredi, priusquam omnia perpendisset: nihil oppugnare ausus est, antequam loci situs & aditus omnes benè cognitos & perspectos habuisset. Vt iure optimo nomen hoc Constantinum Ostrogianum celeberrimum promeritus sit, quod

fit, quod consultè, cautè atq; constanter egerit omnia : *Conueniunt namq; rebus, nomina sæpe suis.*

Verùm ne de secunda tantum fortuna eius dicere videar : quæ dum splendet frangitur, & dum blanditur, captatum venit, quam ille semper in manibus gestitabat, cum constet quantas ille domi militiq; res, & quanta felicitate gesserit, ut suæ volûtati non modò ciues paruerint, socij obtemperarint, hostes obedierint, sed etiam venti tempestatesq; obsecundarint. Hac inebriatus Imperator hic fortissimus, cum oppida, castella, rura, exercituq; Moschorum impunè vastasset fortunam eum, quæ est mutabilior Protheo, (licet sibi semper benignè arrideret :) in altum euehens, in imû usq; deiecit: transmutat namq; incertos honores, nunc huic, nunc alij benigna, nulli verò præstat fidem. Obsessus igitur à Moschis & summa fraude, dolo, locorumq; angustiiis irretitus, capitur bellicosissimus Imperator vnà cum nobilibus Lituanorum, militeq; suo lectissimo: capitur totius decus Russiæ: capitur clypeus & scutum Poloniæ, coniicitur in carceres & vincula ornamētum Sarmatiæ; & quem innumera quondam hostium agmina vincere non poterant, vincitur en miserè ab angustia locorum. Neq; mulò post à Magno Moschorum Duce primò terrore & minis petitur, ut iurare velit se suosq; nepotes nūquam cum



Moschis bellaturos finesq; ipsorum depopulatu-  
ros. At nullis vbi victus est minis, tum Magnus  
Dux frustra inuictum animum auro corrumpere  
nititur, pollicitus multis diuitiis ditare, princi-  
pemq; regni (erat quippe sibi sanguine iunctus)  
habere, modò neglecta Polonia secū regnare vel-  
let. At nihil potuerunt efficere multa promissa  
Ducis, nihil multę facultates, nihil ingens argenti  
atque auri copia. Pręposuit nomen bonum diui-  
tiis multis: pręposuit immortalem gloriam, quif-  
quiliis his deargētatis, quę velut vmbra aut fumus  
pereunt: pręposuit paternum tenue solum, am-  
plis facultatibus; pręposuit ad extremum serui-  
tutem inhonestam, aureę libertati. Quid ita? Ni-  
hil enim gloriosius esse duxit, quàm à maioribus  
acceptam gloriam, diligenti studio conseruare,  
conseruatam pręclaris gestis ornare, ornatam vir-  
tutibus illustrare, illustratam ad posteros inuiola-  
tè ac integerrimè, licet ipse durum seruitutis iu-  
gum pateretur, transmittere. Nihil rursus puta-  
uit, quam labe aliqua maiorum facta deturpare.  
Nihil deterius quàm turpi aliquo facinore maio-  
ribus infamiam patrię ignominiam parare. Ex  
cuius post elapsus vinculis, quantis totā Moscho-  
uiam cladibus afflixit, quot castella vastauit, quot  
vrbes natura inaccessas expugnauit, quot arces  
turibus, machinis belli, & ingentibus tormentis  
refertas

refertas cepit, quot prælia secunda confecit, quot  
millia Moschorum perexigua manu cecidit, ut  
reliqua sileam, vnum illud vnum reuocate vobis  
in mentem Orsenfe duellum, in quo octuaginta  
millia militis robustissimi cesa sunt, tantâ strage e-  
ditâ, ut cadauerum numerus quadraginta millia  
excederet, Ductores exercitus, totusq; Senatorius  
& Equestris ordo vnâ cum quatuor millibus ca-  
priuorum in Poloniam ablegatus sit, castra diui-  
tiis, varioq; armorum genere onusta direpta, va-  
stata, incensa sunt. Quid de Basilio ipso Magno  
Moschouie Duce exercitatisimo proferam? qui  
id tēporis vix semimortuus, velocior tamen Euro  
aut Aquilone ad regiâ suam Mosquam profugit,  
vbi tamen nequaquam tutus esse potuit. Tantus  
tunc pavor & metus totius Moschouie occupa-  
rat animos, ut sine vlllo negotio Smolenscum, &  
alias munitiones complures Seueriensis ducatus,  
quę fraude hostium sunt capte, recuperare pos-  
sent, si castra mouissent vltra: sed nullum preci-  
um maius laborum gloriâ immortali rati, ad pa-  
triam magnâ cum expectatione omnium redie-  
runt, ibique Constantinus Ostrogus exercituum  
Dux, ob perpetuum, contra infidelissimam Mo-  
schorum gentem, odium, stemma, quod sibi affi-  
ne fuerat cum Ducibus Moschorum aboleuit, al-  
liudque ob insignia facta & merita præclara in  
Rempub.



Rempub. sibi posterisque accepit. Sed quid ego  
hec necquicquam ingrata reuoluo? non enim si  
mihi linguę, oraque centum sint, aut ferrea vox  
(vt Maro inquit) omnes tamen maiorum ipsius  
virtutes possem percurrere. Enimuero quis pa-  
rentis ipsius Clarissimi egregia facta, & merita in  
Rempub. enarrare valeat? Quis eius algores, ex-  
stus noctes diesque sub dio insomnes, patrię ergo  
orationis vbertate recensere queat? Quis bella,  
quę ipse pro Patria, vnā cum parente prudentis-  
simo atque fortissimo Duce gessit? Quid enim  
de pueritia ipsius dicam, in quā ille statim è ludo  
literario, & ex phebīs egressus, imò vix teneros  
à terra contingens ramos, postliminiò ad patris  
exercitum atque in militię disciplinam profectus  
est, qui in extremā pueritiā parenti suo Imperato-  
ri obedientissimus fuit, mox ingruente adolescē-  
tia maximos ipse exercitus duxit, magnis cohor-  
tibus præfuit, magna bella gessit, qui sæpius ho-  
stes eminus hastis, & cominūs gladiis aggressus  
est, quàm quisquam cum inimico odia suscipere  
ausus est, qui plura prælia confecit, quàm aliquis  
legit, plures vrbes expugnauit, quàm alius vidit,  
plures prouincias & oras terrarum Vulcano con-  
secrauit, quàm quisquam concupiuit, aut cupe-  
re voluit; qui adolescentiam non in ludis aut vo-  
luptatibus, sed in puluere Martis triuit: vt quò  
gloria

gloria fama; maiorum suorum penetraret, eodem  
tela manuum suarum peruenerint. Quis est hostis  
tam ferox, quem ille iuuenis non subiugarit? quæ  
regiones & prouinciæ exterarum gentium, tam mu-  
nitæ quæ aduentum illius non perhorruerint? Age  
verò quid ea quæ in virili ætate gessit reuoluam? ut  
non maiorum suorum stragulis & titulis apud suos  
& externos inclaruerit, sed propriâ virtute (honus e-  
nim est virtutis, non generis præmiū) laudem amo-  
remque promeruit. Quis illius consilia in Senatu  
prudentissima complecti posset? Quis se humani-  
tatem orationis vbertate, adumbraturū putet? ut  
difficile dictu sit, pluresne regiones hostesque be-  
neuolentiâ ac humanitate, imitatus Romanorum  
Duces, deditione acceperit, an verò armis subiuga-  
rit. Quis ipsius constantiam animi, in sententiis fe-  
rendis pro commodo Reipub. satis dignè effari  
queat? Siue enim fractus, ut Horatius inquit, illa-  
batur orbis, impavidum ferirent ruinæ.

*Iustum (siquidem) & tenacem propositi virum*

*Non ciuium ardor, praua iubentium*

*Non vultus instantis Tyranni,*

*Mente, quatit solida.*

Quis liberalitatem in egenos, clementiam in ciues,  
magnificentiam in religiosos, charitatem in patriam,  
pictatem in Deum, dicendo exprimere valeat? Quis  
denique austeritatem in superbos, mansuetudinem

C

autem



autem in subiectos eloqui audeat ? vt iure sibi vendicer illud Maronianum.

*Hæ tibi erunt artes, paciꝫ imponere morem,  
Parcere subiectis & debellare superbos.*

Quare summâ Dei omnipotentis benignitate plusquam Nestoreos vixit annos, & vtinam diutius vixisset. Verùm summo cum dolore filij, & mœrore ciuium, patriæq; luctu, ex hac statione ad beatas illas superiorum sedes demigrauit; æqua enim tellus pauperi recluditur, Regumq; pueris, & calcanda semel via lethi omnibus superest. Quo mortuo quantus tota in Russia luctus & gemitus exaudiebatur? quântæ sollicitudines præcordia virorum impleuerant? quanto fletu & gemitu infantes ora genasq; suas lacrymis humectabant? quanto clamore virgines & matronæ honestissimæ æthera complebant? quis est qui nesciat? Exaudiebatur vbiq; locorum planctus: vici collesq; gemebant Quid multa? vbique pallor, fletus, & plurima mortis imago obuersabatur, omnium ætatum, omniumque ordinum atræ ac sordidæ vestes apparebant, forum mutum & obscurum æquissimo iudice orbatû silebat, ruebant cœlo quasi vndique tactæ domus, ædesque regifico luxu & Dedaleo opere exstructæ viduatæ erant, vrbs ipsa mœrens atq; prostrata, omniaque templa quæ ipse inuifere solebat, denudata cōspiciebãtur. Deuolat mox in ædes filij, ob ægritudinem parentis mœstissimi  
eius

eius acerbitatis nūcius: quo áudito cōcidit extēplū  
exanimis, multisque lachrymis faciem deleuit. Nec  
mora pedibus æger defertur ad palatia parentis ca-  
rissimi, quo viso procidit lachrymabundus ad ora  
lurida, atque in hæc verba profatur. O mutatam fa-  
ciem domus. Heu mēstum aditum tristemq; aspe-  
ctum. Quid loquar, aut quid taceam? vbique ima-  
go mortis apparet. Vbi iam solatia quæram? à quo  
consilia petam? Quem alloquar? Cuius dulciori  
sermone fruar? Quo domi mentem oblectabo? Quò  
vertam gradum? vbique in ædibus solitudo mērore  
animum conficit. O fallacem spem hominum. O  
inanes cogitationes. O miseram generis humani cō-  
ditionem. Quid es ô homo, nisi imbecillitatis exem-  
plum, temporis spoliū, fortunę lusus, inconstantie  
imago, inuidie & calamitatis trutina. Quid tanto pe-  
re de tuis diuitiis gloriaris? Cur te aliis superiorem  
esse iactitas? siquidem dum tibi maxima polliceris,  
minimis potiri nequaquã potes. Superet quis robo-  
re Cyclopes, velocitate Aquilonem, formâ Tytho-  
nū, opibus Mydam & Cyñarâ Reges, linguę suauita-  
te Adrastū, eloquij tubâ Ciceronē? omnia hæc à falce  
mortis intereunt, viliusq; post funera algâ pendūtur.

*Vbi enim semel occideris & de te splendida Minos*

*Fecerit arbitria,*

*Non Torquate genus, non te facundia, non te*

*Restituet pietas.*



Vt Lyricus ait. Nec luce cassis post frui datur luce.  
Quò igitur abis carissime parens? Cur iam mecum  
degere renuis vitam? Cur me in omnia pericula nō  
rapis tecum? cum magnum sit solatium afflictis ha-  
buisse socios laborum dolorumque. Nulla me iam  
nulla iuuabunt cōuiuia, sed dura singulis horis tran-  
sigam suspiria, nulli me dulces cantus aut colloquia  
oblectabunt, nam cuncta vitæ gaudia mors abstulit  
tua. O mortem inexorabilem, quæ neque iuuenum,  
neque senum, poplitibus parcis. O portentum na-  
turæ, quod neq; pauperum, neq; Regum filiis par-  
cere didicisti, sed æquo pede pulsas pauperum ta-  
bernæ, Regumque turres. Non te vnquam flecte-  
re poterant pauperum lachrymæ, non te perterrit  
militum, armorumq; fragor, non te remouerunt  
magistratus fasces, non sceptræ Principum, non sa-  
tellites aut stipata cateruæ Regum, sed per medios  
volas satellites, & perrumpis saxa potentiùs ictu ful-  
mineo. Quid verò iam ipsius vrbis Ostrogia luctum  
commemorem, ne iam obductam cicatricem re-  
fricare videar? Quas illa voces edidit? Quo dolore  
& gemitu Principem suū est prosecuta? Amisimus  
sapientem Principem, iustum iudicem, fortem &  
strenuum bellatorem. Perdidimus decus & splen-  
dorem patriæ, præsidium legum, ornamentum di-  
gnitatis nostræ. Hic enim non solū mihi præfuit,  
verū etiam profuit, non modò me rexit, sed etiam

texit,

textit, non modò seruauit, verùm quoq; beauit, non  
solùm detraxit calamitatem, sed & auxit cum impe-  
rio dignitatem. Quò properas patrone? Quò rape-  
ris gubernator? Quis te mihi aufert præsidentem & vin-  
dicem libertatis? Quis tibi nuper non inuidit Du-  
cum fortissime, cui omnia prope supra votum &  
virgulâ (vt aiunt) Diuinâ acciderant, nunc autem  
cuncta sunt aduersa. Non tibi defuit clari generis  
splendor: non facultatum copia: non ingenua to-  
tius corporis pulchritudo: non facies liberalis mul-  
to rubore suffusa; non oris venustas, non soboles  
digna tanto parente; non deniq; parta validâ dex-  
trâ gloria defuit: nunc autem sine nomine iaces,  
nunc victus è palatiis tuis cedis victrici mortî, nunc  
à patria, filio, amicis, consanguineis, & à subditis tu-  
is abis. Heu caducam mortalium vitam. Tu nuper  
hostium Russiæ fuisti terror, tu nuper amplifican-  
dorum bonorum & ornamenti autor extitisti: mo-  
dò autē in squalore & gemitu omnium iaces, meq;  
ipsam, quæ te alui, orbatam consilio, ope, & autori-  
tate destituiti. Tu nuper hostes dominandi libidi-  
ne inflâmatos domuisti, vicisti, tuoq; imperio subie-  
cisti; nunc autem à Parciis victus & occisus es. Et cu-  
ius arma expertus est fœdifragus Moschus, Turca ti-  
muit, Scythia perhorruit, nunc ipse falcem mortis in-  
curristi. Et qui semper aliis vitam pariebas vt ex ipsis  
penè faucibus mortis nonnullos eriperes, nunc ipse



ad sepulturā deferis. Heu me miserā post obitum  
tanti Principis, manibus mihi date, lilia plenis, date  
benè odoratos flores, vt his saltim animam carissimi  
Ducis accumulem donis, & munere, heu infelicem  
ac luctuosum diē, inani onerem, si nullus alius mo-  
dus cōceditur. Occidis ergo iam occidis ô Sol Cla-  
rissime, & nos in ista caligine, & nymbis ciuiliū  
bellorum relinquis. At crede mihi non occides, sed  
in filio tuo IANVSSIO viues & lucebis: quem vo-  
uemus salubrium consiliorum tuorum, vt potentiæ  
atq; opum hæredem. Quidni autem erit? tali stirpe,  
educatione, indole, imò nouum & salutare sydus e-  
xortum eum esse speramus, ad illustrandum & ve-  
getandum Regnum hoc Poloniæ florentissimum,  
Deus vota nostra audiat, & illi cōsilia atq; animum  
donet, bene decernendi, fortiter patrandi. Tui verò  
ipsius Princeps & Dux fortissime, nunquam me ca-  
piet obliuio, nunquā tui Russia obliuiscetur, nun-  
quā Polonia tuas laudes satis enarrare poterit, sem-  
perq; diem mortis tuæ acerbum venerabitur & ce-  
lebrabit. Verū enimuerò ancorā classis solutā, ne  
totis sinibus eam pandam, neue in profundo ampli-  
us sine remis velisq; decurram, ad IANVSSIVM pa-  
tronum studiorum meorum clementissimum cur-  
sum sermonis mei dirigo. Vnde autem eum laudare  
incipiam? An corporis dignitatem vultus atq; oris  
elegantiam, faciem liberalem & Senatorium quen-  
dam de-

dam decorem prædicem? quæ licet à fortunâ pen-  
deant, non tamen omittenda esse putavi, præsertim  
in viris illustri loco procreatis, in quibus indoles  
præclara magnarum solet esse indicium virtutum.  
Omitto fortunæ bona, quæ sunt adiumento homi-  
nibus ad res præclare gerendas. Prætereo ingenium  
docile & acutum, industriam magnam, solertiam  
insignem, in rebusq; agendis dexteritatem laudabi-  
lem: quæ omnia magnum semper & clarum virum  
fore denotant. De cuius infantiâ quid dicam? in quâ  
magna virtutum indicia in illo enituere. Quid pue-  
ritiam attingam, quam ille non otio, quod est pestis  
adolescentum, sed labori, qui est gloriæ parens con-  
secrauerat? traditus namque à parentibus eruditis  
præceptoribus literis informandus, quibus ætas pu-  
erilis ad humanitatem informari solet, tanto animi  
feruore studia literarum amplexus est, ut nulli pal-  
mam in artibus concederet, sed omnibus semper  
superior esset. Cui utinam similes plures Sarmatia  
nostra habeat, felicius tranquilliusq; habitura. Quid  
adolescenciam reperam, quam ille in alienis terrarû  
oris triuit? Præsertim apud Cæsarem suâ ætate Chri-  
stiani nominis amantissimum, religionisq; Christi  
cultorem diligentissimum: in quo admiratus cul-  
tus Dei omnipotentis feruorem, & integritatem vi-  
tæ, eiusdem religionis cultor sedisq; Apostolicæ a-  
mator esse voluit. In quâ ætate summum in eo cul-  
tus Di-



tus Diuini studium enituit. Pater enim cum audisset ab auita maiorum suorum religione eum desciuisse, nusquam amplius paternum animum sibi declarare voluit, sed malesuadâ fame & turpi egestate à proposito sancto iuuenem, abducere nisus est frustra. Nihil enim inedia, algores, æstus, animus infensus, nihil ad extremum minę effecerunt: cum nihil haberet delectabilius, quàm in Orthodoxa Ecclesiâ verum Deum colere, qui sua suauitate omnes exuperat delitias & voluptates mundi, vt à patre desertus contentus esset gausape vili, pane & aquâ purâ: vt cętera fileam, quę ille modestissime pertulit, sciens nihil esse infelicius eo cui nihil vnquam euenit aduersi. Enimuerò vnde cognoscere possumus, quantum sit alicui animi ad perferendam paupertatem, si diuitiis sęper affluat? vnde possumus discere, quantum aduersus ignominiam ac infamiam, odiumque popolare cōstantię habeat, si inter plausus senescat? Vnde possumus videre, quantum in aduersis valeat malis, si secunda fortuna semper sibi arrideat? Calamitas siquidem virtutis est occasio: neq; imbellem virum (vt Mimus ait) capiunt pericula magna. Auida est semper periculi virtus, & quò tendat, nō quid passura sit cogitat. Quid? Nonné in tempestate gubernator, in acie miles noscitur? Nonné in castris pericula fortissimis imperatur. Nonné Duces, lectissimos semper militum mittunt, qui nocturnis hostes ag-

stes aggrediātur, insidiis? Nonné exercitatissimi mit-  
tuntur, qui aut explorent iter, aut impedimenta lo-  
corum tollant? Nonné eos socios omnium pericu-  
lorum habent, qui robustâ manu quatiant hastam,  
ac impavidum pectus fortiter obiciant telis? Vo-  
lunt enim vt igne aurum; sic miserâ & periculis pro-  
bari milites fortes. Pari quoquè ratione quis viros  
probos acceptos Deo poterit cognoscere, nisi vide-  
at eos laborare, sudare, mala patienter ferre, & per  
ardua ad culmen beatitudinis ascendere. Bonum  
etenim, summus ille cæli terræq; gubernator, non  
vult esse in delitiis virum, castigat, experitur, in-  
durat, duriusq; educat, quem sibi præparat. Quæ ille  
omnia (& maiora paratus ferre) pertulit. Cuius ego  
virtutes dum recensere cupio, dicendum mihi cre-  
do esset quantâ fide semper erga Reges, quantâ ani-  
mi magnitudine aduersus tela & procellas incon-  
stantis fortunæ, quantâ humanitate in victoriis tem-  
perandis, quantâ facilitate erga subiectos, quantâ in  
omnibus rebus temperantiâ, quantâ deniq; rebus in  
agendis industriâ præditus sit; quibus ille Constan-  
tini Ducis aui sui virtutes ad vnguem expressisse, ef-  
finxisse, & efformasse videtur. Quid enim fidem Cō-  
stantini aui reuoluam, quam ille Regibus semel da-  
tam, semper sartam, tectam, ac inuiolatam seruauit?  
hac quoq; huic Principi nostro nihil est carius. Quid  
humanitatem illius erga deuictos, vt haud facile sit

D

scire



scire plusnè armis quàm humanitate in deuincen-  
dis hostibus valuerit? in hac quoq; noster palmam  
sibi prèripi non patitur. Quid facilitatem illius erga  
subditos? nullus fuit quem ille non benigne susce-  
perit, & allocutus sit; huius quoq; magna sunt vesti-  
gia in animo nostri Principis infixæ. Quid tempe-  
rantiam incredibilem? nunquàm illi nimius appara-  
tus aut Põtificum cœna, sed semper frugalis & Phi-  
losophica mensa cara fuit: huius etiam virtutis ri-  
gidissimus, noster Princeps est satelles, ni liberalitas  
à maioribus insita expostulet; est enim valde deco-  
rum patere domos virorum illustrium, hominibus  
inferioris conditionis & fortunæ. Quid in rebus a-  
gendis dexteritatem commemorem? Semper ille  
vincere, nunquam vinci, semper ducere, nunquam  
duci, semper cædere, nunquam cædi, ni eum semel  
perfidissima Moschorum gens dolo vicisset, didice-  
rat: hæc quoq; huic Principi felicissimo, iure quodã  
hereditario debetur, cum nidus eorum Ostrogia, in  
qua alti & educati sunt, nil nisi consilium quoddam  
sagax denotet: quæ me omnia tacere breuitas cogit:  
illa enim quæ gestio dicere, sunt veluti fontes & ca-  
pita, ex quibus ceteræ virtutes promanarūt. Atq; in-  
primis mihi gesta illustria occurrunt. Quis enim est  
quem lateant illius bella in iuuenili adhuc ætate ge-  
sta? Reducite vobis in memoriam ingentem illam  
Tartarorum stragem, quæ nostrâ memoriâ sub op-  
pido

pido Dubno ab ipso est facta : cum totam Podoli-  
am, Russiam, Voliniam, multis cladibus afflixissent.  
Huic namq; parēs decimum octauum annum agē-  
ti, cum castra militiæ suæ tradidisset; omnibusq; vt  
dictis parerent, præcepisset; cumq; tota Russia iuue-  
nem Ducem, at prudentem Imperatorem, viribus  
minùs fortem, at consilio validissimum: iuuenem  
ætate, at virum robustissimum; tyronem militem,  
at ductorem sapientissimum, habuisset. Qua tamen  
fortitudine nefarios conatus Scytharum, iuuenis li-  
cet represserit, qua diligentia omnes dolos hostis  
crudelissimi euitarit, quantamq; cladem in hoste fe-  
cerit? hucusq; Scythæ illud prælium acerbū diemq;  
luctuosam habent. Vbi namque summo diluculo  
omnibus modis aditum vrbis, cui pater iuuenem fi-  
lium præfecerat, attentassent: vbi omnes neruos vi-  
rium suarum, ingeniumq; callidum ac vafrum, alle-  
cti spe opimę prædę, (cum didicissent patrem filios  
filiasq; suas ibidem reliquisse) vbi inquam totas vi-  
res intendissent; vt nihil esset prorsus, quod intra  
spatium quatuor dierum intactum aut intentatum,  
non modò diebus, sed etiam noctibus reliquerint.  
Verùm spe decepti cum iuuenis vigilias prudenti-  
amque aduertissent: non sine magnâ suorum strage,  
ab vrbe magno cum dolore discesserunt, per to-  
tamq; Russiam fusi, vix pauci penates suos reuise-  
runt. Iacet iam Roma totius quondam orbis Do-



mina Camilli virtutes, pietatemq; in patriam. Cum enim in exilium missus esset, patriamq; à Gallis captam, edes diuulsas atq; dirutas, iuuenes in seruitutem raptos, Consules cecos, optimates trucidatos, templaque pro scelus Dei Omnipotentis profanata audisset, congregauit haud mora Camillus patrie amantissimus militem pauculum, paruaque manu, immemor ignominie sue quam à Consulibus acceperat, feroces barbaros aggressus est, dispulit, fugauit, atq; cecidit; iisque salutem à quibus ipse exilium passus erat, peperit. Magnum equidem fuit pietatis exemplum in Camillo patriam à Gallis liberare; in qua ipsi aqua & igni interdictum erat. Magnum amoris indicium, Consules in patriam reducere; à quibus ipse pulsus fuerat. Magnum charitatis signum, parentibus liberos saluos ac incolumes restituere; apud quos exorsa fuerat memoria Camilli. Magnum deniq; religionis ac probitatis argumentum, penates in urbem deferre; à quibus longissime in æternum exilium ablegatus fuerat. Nonne maior pietas in nostro hoc Principe apparuit: qui non in exilium (quod sapientes nunquam inuiti, fortes etiam sepe libenter appetiuerunt) relegatus erat, sed quem à vero cultu Diuino, quo nihil est homini probo in vita carius, pater abducere voluit; ille tamen oblitus malorum, quæ ab amicis pertulerat, fratrum, sororum, subditorumq; presidium fuit. Quid referam illam,

illam, propria sua manu, partam ad oppida Piątek & Czudnouiam, victoriam? Cum enim decem millia hominum nequam, ex cōfiniis Scythicis aduolassent, orasq; Russiæ & oppida parentis sui vastassent; impatiens IANVSSIVS illorum atrocitatis, congregat militem, aduocat fratres, inuitat parentem senio confectum, bellumq; non minùs cum hoste potentissimo, quàm cum audacissimo gerendum esse militibus nunciat: aduolat nec mora velocissimè ad oppidum Piątek quod vi occuparant; classicum canitur, milites fremunt, furor ad extremum vndiq; arma ministrat: quod vbi vicos vrbis perfonuit, vndiq; portis homines nullius fidei pietatisque, sed qui assiduò, pręda raptoq; viuere consueuerunt, somno sepulti poculoq; plusquam Circeo madidi, ad pręlium funduntur, socios conuocant: alij enses & arcus corripunt, alij inermes (proh hominum Diuūmq; fidem) in pręlium ruunt. Quorum tam effectum audaciam, multitudinemq; innumeram, stipitibus duris armatam, Ductores exercitus admirati, diu pręlio ancipite in acie perstiterunt. Attamen hic Dux inuictissimus satiùs esse ratus, immortalitate glorię semper vigere; quàm vitam obscuram intra parietes priuatos degere, prosiluit in medias hostium turmas, exoptans potiùs mortem quàm cum ignominia stationem semel arreptam deserere, aut hosti terga dare: quod vidētes milites irruūt acriùs



omnes in hostem, cędunt, prosternunt, profligant;  
ut vix Dux ipsorum in abdita loca montium profu-  
gerit. Quis illius diei stragem enarrare queat? Quis  
numerum cęsorum recensere? Elucet ad hæc tem-  
pora illius pugnæ indicia magna Apparent hucusq;  
tres ingentis magnitudinis tumuli, in quibus cada-  
uera cęsorū sepulta sunt. Extant ad hunc diem ob  
sempiternam memoriam insignia multa, quæ sem-  
per IANVS SIVM Magnum prædicant & prædica-  
bunt. Etsi in omni victoriâ quæ de hostibus capitur  
milites sibi vnâ cum Imperatoribus aliquam gloriæ  
partem vendicant; huius tamen victoriæ, quam est  
paulò ante adeptus, socium habet neminem, totum  
hoc quantumcunq; est, quod certè maximum est,  
totum est, inquam ipsius. Nihil sibi ex istâ victoriâ  
pater ætate grauis, nihil fratres, nihil cohors, nihil  
turma armis inuicta, decerpit, illius est tota, illius  
propria victoria. Quid igitur si summus Imperato-  
rum nominatur Affricanus Scipio, quod parvâ ma-  
nu magnas hostium copias fundebat? Quis minori  
manu maiora agmina profligauit? Collocatur in  
numero Imperatorum fortissimus Carthaginensiū  
Dux Annibal, quod sæpenumerò fortissimas Ro-  
manorum ac penè inuictissimas legiones audaciâ  
solâ compresserit. Quis vnquam fortiozem hostem  
maiori audaciâ hoc Principe prostravit? Præfertur  
omnibus Imperatoribus Magnus Alexander, quò d  
multos

multos barbaros & immanes hostes domuerit. Quis  
vnquam duriores hostes domuit? quid dicam do-  
muit, imò ad internecionem deleuit. Silentio in-  
uoluo nuper lectissimum militem ad Moschouitici  
imperij oras cum inuictissimo Rege Sigismundo  
missum. Prætereo quot clades quotidie in Turcarū  
gēte bellicosissimā, dum Macouiciam rexit, fecerit,  
quot vrbes munitissimas, insulasque inexpugna-  
biles vastauerit, prætereo. Quid plura? Nullum pe-  
nè genus belli potest esse, in quo eum fortuna non  
exercuerit. Notum est omnibus ciuile illud ac inte-  
stinum nostris temporibus bellum infelicissimum,  
cum irā & furore quodam omnes perciti, ad arma  
(quòd Deus iam amplius aueruncet) prosiluerant,  
dum diuersę voluntates ciuium fuerant, distractę  
quę sententię, neq; consiliis solū & studiis, sed ar-  
mis etiam & castris dissidebant. Versabatur in ca-  
stris furor, in curia timor, in foro coniuratio, in a-  
gris vastitas, in campis exercitus, ferrum in iugulū  
& ceruices ciuium sociorumque exacuentes. Quid?  
In omni, heu infelicissima tempora, sede & loco fer-  
rum, flammę & incendia dominabantur, templū  
quę pacis, arietibus, heu infelices annos, Martiali-  
bus iam iam cadebat. Hic tamen prudentissimus  
Princeps cum tantam cladem & exitium fermè Rei-  
pub. suisque manibus totam Poloniam, (quę tot  
seculis semper floruit) ruere animaduertisset: adue-  
nit en



nit en subitò fortissimus heros robusto stipatus mi-  
lite, in medioq; acierũ castra sua locare, haud quic-  
quam, veluti inscius malorum, reueretur. Heu quid  
agis Princeps inuictissime. Cur te spontè in tantos  
impetus obiicis? Cur vitam tuam, teque è periculis  
non subducis? Cur in medias irruis acies, & tantũ  
oppetis discriminẽ rerum? Cur tuũ pro omnibus tra-  
dis periculis caput? Iucundũ tibi est pro patriã, quæ  
omnes omnium caritates sola complexa est, discrim-  
en vitæ subire: iucundum tibi mori, vt aliis vitam  
restituas: iucundum salute tuã salutem patriæ re-  
presentare. Fremebat namque hĩc miles armis, nu-  
meroque ferox, illĩc manu robustus, micabat hĩc  
hastarum fulgor, illĩc armorum splendor, volabant  
hinc iacula è tormentis missa, illinc haste eminũs ia-  
cte, exaudiebantur hinc galearum sonitus, illinc en-  
sium strepitus, vndique fremitus (vt rem paucis cõ-  
plectar) equorum iuuenumque exaudiebantur. O  
incredibilem animi fortitudinem O singularem in-  
genij dexteritatem. O inuictum pectoris robur. O  
illustrem ac verè Diuinam sapientiam. Quod enim  
nullus Ducum peritissimus armis prestare potuit,  
vt pacem, in quã omnia regna florent, compone-  
ret; hoc ipse singulari suã sapientiã est assecutus. E-  
nimuerò cunctatione solã quæ militum frangit a-  
nimos, id effecit, cum neutri vellet adherere parti,  
vt nonnulli domos suas rebus infectis abierint, nõ-  
nulli

nulli ad Regiam maiestatem descenderint, ab aliis arma posita, aliis erepta sint, non nulli autem, heu miserè victi, pacis conditiones, alieno periculo edocti, susceperint. Cedat igitur sagum togæ, cedant castra foro, cedant consiliis arma, vnus homo vnus cunctando restituit rem: Vnus sagacitate mentis celeritatem corporum vicit; vnus fortitudine animi inuicta, militiæ fulgura dispulit; vnus deniq; consilio furem in armis Martis furorem repressit. Valeat iam Roma quæ suorum ciuium, qui pro patria aliquid præclari gesserant, triumphos & laudes satis prædicare non potuit. Taceat parens Eloquentiæ Romanæ Cicero, qui se parentem patriæ, quod Catilinam nefarium ciuem vrbe pepulerit fuit nuncupare. Glorietur IANVSIVS sapientissimus qui non vnum Catilinam, sed multa millia virorum, non expulit, sed sedauit. Conticescat Fabius Maximus, qui cunctando Annibalis vires fregerat, cum domi viuū habeamus Fabium; ille namq; extra muros, hic intra mœnia; ille in campis, hic in foro sedauit furem Martem, quo malo & veterū memoriâ & nostrâ ætate florentissimas Respub. ciuitatesq; occidisse omnibus constat. Ille robustum militem, at Ducem effeminatum; hic milites Imperatoresq; bellicosissimos: ille amenitate locorum voluptatibusq; belluinis eneruatum militem, animus siquidem delitiis mancipatus perdit vires consiliumque; hic autem

E

vetera



veteranos milites in castris exercitatissimos, domi  
forisq; laudatissimos, sapientia & cunctatione restin-  
xit, sustulit. O felicem Russiam quæ tantum pro-  
creasti Principem. O fortunatissimos parentes, qui  
talem progenuistis filium. O beatam Poloniam, quæ  
tam prudẽtem Senatorẽ nacta es. Quorum etenim  
fortissimorum Ducum, quarum gentium exterarũ,  
potentissimorumq; populorum, aut Regum Cla-  
rissimorum facta, cum huius gestis vel contentionis  
magnitudine, vel numero præliorum, vel dissimili-  
tudine bellorum conferri poterunt? Proprium fu-  
it aliis viribus corporis res magnas conficere, com-  
mune quibusdam multitudine amicorum septos  
summa rerum tentare; peculiare nonnullis audacia  
fretos illustria facta aggredi: quid dicam de his qui  
fortunæ bonis cumulati suprema moliuntur cacu-  
mina plerunq; rerum. At hic felicissimus Princeps  
nō audaciã aut viribus, sed sapiẽtiã solã virtutibusq;  
quibus nihil est præstantius in toto orbe, præmuni-  
tus, magna & humani ingenij vires supereminentia  
consequi ausus est. Sed iam Magnificentiam quæ est  
heroum Principumq; opulentissimorum virtus sa-  
lutemus. Magnifici enim atque ampla spectantis vi-  
ri est, & ad liberalitatem, id est, ad decus & gloriam  
nati, in eas res profundere pecuniam, quæ diutissi-  
mè manere possint, laudemque & gloriam immorta-  
lẽ pariant. Huius verò Principis clementissimi quis  
est qui

est qui magnificentiam ingentem (quæ est sibi tan-  
quam hereditaria virtus à maioribus data) non ad-  
miretur? Quis ignorat quantos ille sumptus pro tu-  
tella patriæ, hostes è finibus Russiæ propulsando fe-  
cerit? Quem latet quantum ille in Russia in extru-  
endis arcibus, quæ hostibus terrori essent elocarit?  
Quem fugit quot ille millia virorum fortissimorum  
ad depellenda pericula, pecuniâ sua alat atque foue-  
at? Cui ignotum est quantas ipse facultates, in ho-  
norem cultumque Diuinum, templa ingentis ma-  
gnitudinis sumptuosè exstruendo atque ditando  
exponderit? Quid enim oppida, vt à minimis ordi-  
ar, quæ ille fossis, vallis, murorumque machinis cir-  
cumduxit commemorem? Testis est oppidum Du-  
bno menibus arduis vndique munitum, plurimis  
palatiis ornatum, tormentisque variis refertum. Te-  
stis Ostrogoia muro lateritio circumducta, arx ipsa  
turribus vallidissimis onusta. Testis Constantinouia  
inaccessa hostibus. Sed hæc leuia sunt; illam quam  
ipse in limite Scythiæ ingenti ope, ciuitatem nomi-  
ne Raczkon, arce, vallis, portu, turribusque formi-  
dabilè quis non admirabitur? Age verò quot tem-  
pla magnificè ædificauit? quot sacella erexit? quot  
ab execrandis hereticis atque Russis profanata re-  
staurauit? quot annuis stipendiis atque cēsu dita-  
uit? Liquet credo omnibus quāto artificio & quā-  
m magnificè Mausoleum Tarnouia in sempiternam



sui nominis memoriam erectum est. Quod si quis paulò diligentius inspexerit, non amplius proculdubio aureæ statuæ Romanorum requirendæ essent; quas illi pro breui vita, Imperatoribus suis, qui ob Rempub. mortem obierant, in Rostris ad perpetuam memoriam erigebant. Non columnæ Delphici templi, ex quadratis lapidibus fabricatæ. Non Mausolea Regis Carix, quæ inter septem miracula mundi numerabantur. Superat hoc multum omnia antiqua sepulchra pulchritudine, superat impensis, superat artificio. Quàm venustè sunt duæ pyramides altissimæ ædificatæ, fundamentum autem ipsius sepulchri ex lateribus coctilibus erectum; in cuius lateribus est tabula aureis literis notata, super quam puluinar ex marmore in longitudinem sex cubitorum, quod sustinent quatuor leones tenentes stemmata, & insignia auorum atauorumq; Ducum in Ostrog: in puluinari autem effigies Ducissæ flexis genibus ante passionem Christi, ex alabastro excisam. Quid plura?

*Non vidiſſe ſemel ſatis eſt, iuuat vſq; morari.*

A tergo namq; passionis est effigies S. Ioannis & B. Mariæ: sita verò passio in tabulâ marmoreâ: cuius à tergo duo catefracti milites equis insidentes ex alabastro, longitudinem duorum cubitorum excedentes. Supra illos Angeli, à tergo ex alabastro, tabellas marmoreas tenentes, aureis literis notatas, titulos

*Illuſtriſſi:*

Illustris: Ducissæ referentes; Supra passionem insignia Martis ex alabastro; à tergo Angeli, in suprema parte mors subtili structurâ polita ex alabastro, cum clepsidra, à tergo quoq; Angeli apparêt: quæ omnia sunt (vt multa alia præteream) miro artificij genere deaurata & excisa. Certabunt credo gentes, admirabuntur posterì, intuebitur ipsa æternitas artificium tam insigne: verùm nullus posterorum ne dicam simile sepulchrum exstruet, sed ne depingere quidem poterit. Prætereo Polinium, Silco Constantinouia, taceo Ostrogiam; vbi templa augusta regali sumptu cõdedit. Miedziricium ipsum meâ memoriâ ab ipso excitatum videamus. Quantis vndique vallis, amneque rapidissimo est cinctum? Quot portis turribusue altissimis septum? Quot tormentis bellicis repletum? Quot palatiis exornatum? Quid si magna paruis, vt Maro ait, componere licet. Quàm est magnifico sumptu templum D. Francisci è quadrato lapide intus sex sublimibus columnis ad æthera vsque euectum? Quàm artificiosè turriculæ quinq; supra sunt in templo constructæ; in quibus sunt fenestræ lucidissimæ? Quantâ impensâ turres quatuor altissimæ in lateribus templi structæ? Quid ædes inhabitantium memorem? Multa sunt sacella augusta, in quibus religiosi viri preces, horas, meditationesq; suas nocte dieque expediunt. O fortunatum Miedziricium. Quæ ciuitas opulentissima tam bre-

ui tēporis spatio tot vallis & fossis latissimis est con-  
cisa? Quod oppidum in totâ Volinia tot ædibus  
magnificis exornatum? Quis locus vnquā tot Prin-  
cipes Clarissimos, Senatores prudentissimos, heroas  
fortissimos, virosq; religiosos comprehendit? Tu  
modò tu gloriaberis, quod tantos viros ex tota Po-  
loniâ habueris; tu prædicaberis ab omnibus quòd  
tot fideles Christi, cultoresq; religionis foueas; tu  
solùm laudaberis quod sis fax & lucerna cultus Di-  
uini Russis. Cessisset tibi nūc Roma quæ fuit quon-  
dam totius orbis caput & regina: in illa enim Ioues,  
Martes, Veneres, Vulcani, venerationi erant; in te  
autem verus colitur Deus: in illâ fuerant templa  
dæmoniis gentium dicata; in te autem templum il-  
lustre numini Diuino est consecratum: illa sumpsit  
suum primordium à Romulo, qui à pastoribus edu-  
catus erat, tu habes originem à Clarissima gente O-  
strogiorum: illius muri maduerunt sanguine frater-  
no; tui verò muri sunt inuictissimi cōcordia & mu-  
tuus amor ciuium, pietasq; in Deum. Valeat igitur  
Augustus Cæsar, qui semper gloriari consueuerat,  
cum urbem Romam multis modis ditasset atq; or-  
nasset: Romam lateritiam accepi, marmoream re-  
linquo. Et iure optimo. Quid enim Principibus po-  
test esse magnificentius, quàm si ditionem aliquam,  
quam susceperunt, statu meliorem reddant? Quid  
pulchrius quàm si ciuitatem muro turribusq; cin-  
gant



gant? Quid gloriosius quàm ex magnificentiâ immortalitatem glorię querere? An non multò maiorem laudem meretur hic noster Princeps, qui non vnā ciuitatem, sed plurimas, mēibus firmissimis cinxit? qui non in delubra Deorum falsorum antiquorum: sed in templa veri Dei & Sanctorum suam pecuniam exposuit; qui non gloriolę alicuius causā, aut vanam popularem captando auram, vt Romanorum Duces faciebant, sed ob amorem Dei ter Optimi Maximi, honoremq; cultus Diuini atq; Sanctorum, excelsa ac magnifica templa excitauit. Sed his pro tenuitate virium ingenij mei breuiter dictis: nunc ad id quod tertio loco me dicturum esse pollicitus sum, nempe de liberalitate, quę est caput orationis meę, propero, maiusque multò opus moueo. Hac enim hac Principes, subditos suos, in perpetuū sibi deuincunt; hac vnusquisq; amorem sibi apud suos, laudem apud exteros conciliat; hac vnicā Principes à plebe discernuntur. Quis etenim vidit lucem sine lumine solem? Quis vrentem sine calore ignem? sic quis potest esse Princeps aut Rex diuturnus, sine liberalitate? Quid namq; potest excogitari, quod magis condecoret Principes liberalitate? Quid ad amandum magis compellit liberalitate? Quid vt vno verbo dicam beneficentiā inexpugnabilius? Non opus est in altum editas exstruere arces, vbi liberalitas semel firmiter radices suas egerit. Frustra est in  
exce-

excellsum arduos emunire colles, vbi beneficentia regnat. Turpe est illis latera montium abscindere, quos liberalitas vallauit. Stultum est Principibus multiplicibus se muris turribusq; sepire, quos beneficia possunt consociare atq; munire. Saluos semper in aperto Principes præstat liberalitas. Quis enim erit adeò immanis, qui eis audeat moliri aliquod periculum, à quibus beneficia sumpsit? Quis eos nolit esse tutissimos; qui quantò plures in Repub. fuerint, tantò magis ciues liberalitate & munificentia suâ ditiores reddunt, Remq; publicam magis magisq; augment & exornant. Quid ita? Caput enim est omnium virtutum liberalitas, sub cuius vexillo fortitudo, temperantia, & regina virtutum iustitia floret: sine quâ non modò ciues probi, sed ne illi quidem qui scelere & maleficio pascuntur, tranquille vitam ducere possunt. Firmissimum est scutum & arx inexpugnabilis Imperatorû beneficentia Nonné enim plures Alexander Magnus regiones hostesque in deditionem sibi beneficentiâ quàm armis asciuit? Quid dicam de Antigono, qui suadentibus amicis uti Athenas caperet, firmissimis sibi cõmuniret præsidii, ne aliquando desciscerent; respondit se semper in eâ sententiâ fuisse, ut crederet nullum esse præsidium firmitus beneficentia? Huius autem ego liberalitatem, dum penitus perpendo; quam ille mihi ipsi, ut alios fileam, satis largâ & liberali manu contulit:

culit : totus profectò obstupesco , imò vt cum Pòë-  
ta dicam.

*Mihi frigidus horror*

*Membra quatit gelidusq; coit formidine sanguis.*

Cum enim in cæteris virtutibus neminem illi ante-  
ponam ; in liberalitate ne conferre quidem possum.  
Quis est Princeps aut Dux tam opulentus , qui tot  
viros doctissimos eximiis præmiis , ex vltimis terris  
accerditos, in aulâ suâ alat ? quoniam nulla nocte so-  
mnum capere potest , nisi prius multa ex historiis,  
audiat, discat, & memoriæ, quæ est ei comes fidelis-  
simus, instillet. Quot viros optimè de literis meri-  
tos ex Academiâ Cracouiensi celeberrimâ ( quæ est  
ceu gemma in totâ Poloniâ preciosissima, micansq;  
inter ignes, vt quidam ait, luna minores) ad se assci-  
uit ; qui consiliarij & administri suæ voluntatis fo-  
rent : cum semper gloriosum esse ducat , in doctos  
homines erogare pecuniam ? Quot viros religiosos  
ordinis D. Francisci atq; D. Bernardini ad mensam  
suam quotidie habet , eorumq; colloquiis de rebus  
Diuinis fruitur ? Quot egenos inopiâ pressos , quæ  
cursum ingeniorû retardat, viresq; debilitat ac fran-  
git, in studiis literarum informandos alit ? Quot a-  
lienigenas in seruitutem raptos fonte Baptismatis  
initiari iussit, & ad erudiendum tradidit ? Quàm mi-  
hi ipsi, vt ceteros præteream, multa beneficia contu-  
lit ? Cum enim Macouiciâ ornamentum , totius fe-



licissimæ quondam Vngariæ, in potestate haberet : multisq; eam artibus ac dolis vicinus hostis, nempe Turcarum gens ferocissima, sæpius oppugnare contendisset. Ipsius miles fortissimus, qui sub eius auspiciis tyrocinia militiæ gesserat; innumeram sæpenumerò hostium manum à depopulatione illius repressit atq; fugauit, multisque cladibus barbaram illam gentem affecit. Multa tunc bona in cineres & fauillas redegit multa prædia vastauit, oppida atque castella in seruitutem accepit, matronas necauit, optimates trucidauit, iuuenes durum seruitutis iugum ferre compulit, multaque millia hominum ad orcum demisit: liberos ad extremum è gremio & amplexu parètum abreptos in Poloniam relegauit: quos ipse fonte salutari perfusos nonnullos ad seruitia sua informandos dedit, multos viribus pollentes ad artem militarem destinauit: plurimos autem cum sciret iucunditate literarum, nihil esse suauius ad erudiendum in artibus liberalibus tradidit. Ex quorum cum sim numero impium esset me tantorum beneficiorum obliuisci. Non satis namq; illi fuit me errantem, & in tenebris errorum, in quibus natus eram, palpitantem; lumine Catholicæ fidei illustrare: sed etiam fonte sacro baptismatis leuatum, ingenuis atque honestis disciplinis, non seruilibus operis instruendum dedit. Quæ enim laudabilior est industria? Quis labor præstantior hoc qui  
in ani.

in animi cultu consumitur? Quæ cum ita sint quousquisq; nostrum erit, qui huius Principis virtutes nō prædicet? Quas enim maiores quis aut illustriores virtutes requirit? omnes meherclè in eo reperi-  
et. Prudentiam in rebus agendis? In quo maior eni-  
tuit prudentia, dum nuper omnes seditiones & tu-  
multus exortos extinxit. Consilium salubre ad de-  
pellenda pericula patriæ? Cuius consiliis Senatores  
magis in comitiis acquiescūt, vt omnia dicta & ver-  
ba ipsius tanquam ex tripode Apollinis deprompta  
esse iudicent. Amorem erga literas? Quis magis lite-  
ratos viros amplectitur, eorumq; colloquiis fruitur?  
Liberalitatē in egenos? Quis plures inuidā oppres-  
sos paupertate in literis informandos tradidit? Quis  
maiores clades in Tartaris in iuuenili ætate fecit?  
Solut IANVSSIVS. Cuius legiones inuictissimæ to-  
ties impunè Turcarum oras vastarunt, oppidaq; &  
vicos sanguine hostiū implerunt? Solius IANVSSII.  
Cuius plures terrarum oras manuum tela vnà cum  
immortali famâ penetrarūt? Solius IANVSSII. Va-  
leat igitur Roma cum suis Scipionibus, Curiis, Fa-  
biis, Fabriciis, Horatiis, & aliis fortissimis viris. Ta-  
ceant Athenæ cum suo Codro & aliis Imperatori-  
bus. Ecquis hoc Principe ingenio prudentior, iure  
peritior, fide, religione officioq; diligentior, aut San-  
ctior commemorari potest? Ecquis eodem constan-  
tior? Ecquis consilio, virtute, autoritateq; præstan-

tior? Omnes profectò virtutes in eo summe reperi-  
untur; insignis est scientia rei militaris, preclara iustitia, eximia liberalitas, singularis abstinencia, imò vt  
paucis dicam, præter decus & gloriam nihil ipse in  
tota vita cogitat. Numeret igitur quis Reges suba-  
ctos, exercitus fusos, prouincias imperio additas.  
Prædicet Imperatores ex præliis triumphatum agen-  
tes, terras ferro igniq; vastâtes. Referat in fastis quàm  
multos armis hostes aliquis vicerit, regionesque sub-  
iugarit. Iactitet alicuius spolia è cælis Regibus &  
Ducibus fortissimis detracta. Ego contra opponam  
vnum Principem (ANVSSIVM, qui & patriæ tumultus  
sapientiâ suâ singulari sedauit, & prouincias Re-  
gesq; beneuolentiâ deuinxit, & armis si quos oportuit  
oppressit. Quid plura? Legimus Alexandrum  
Magnum à nemine vnquam benignitate fuisse super-  
raturum. Inter alia enim quibus eum natura dotauerat,  
id tamen vnicum semper enixiùs curauit: ne eum a-  
liquis liberalitate excelleret. Nonné autem maior  
in nostro Principe beneficentia relucet? Cuius tanta  
est liberalitas & beneuolentia, vt etiam superare  
beneficentiam illius Titi Vespasiani videatur. Hic  
enim cum inter cœnandum aliquo die esset recor-  
datus, quod eo die nemini quicquam beneficij præ-  
stitisset; memorandam & dignam mehercule Principi-  
pe vocem edidit. Amici diem perdiidi. Laudâda sanè  
vox illius Principis, qui omne diem se perdiidisse  
putabat,



putabat , quâ amicis suum non præstitisset officium.  
Quantò laudabilior est huius Principis liberalitas;  
cum ille amicis, hic verò cuiusvis conditionis homi-  
nibus modò ipsi velint innumera beneficia, non sin-  
gulis diebus vt ille ; sed cunctis etiam momētis non  
denegat. O insigne exemplar liberalitatis. O excel-  
lens ornamentum literarum. O pulcherrimum de-  
cus Russiæ. O firmissimum præsidium Poloniæ. Vi-  
gebit tua fama, vigebit humanissime Princeps, quàm  
diu Horynnus præterfluet Ostrogiam. Florebit no-  
men, quàm diu lucidissimum iubar solis percurrat  
Sarmatiæ oras. Lucebunt tua facta præclara quàm  
diu Ostrogianum nomen in orbe fulgebit. Celebra-  
bunt te non solùm nostræ, sed omnium penè genti-  
um literæ atq; linguæ Pleni erunt libri posterorum  
tuarum laudum , plenæ sapientum voces , plena e-  
xemplorum vetustas. Sed ad quem iam portum ve-  
la sermonis mei in profundum hoc mare expansa ;  
quod latissimum vndiq; ad dimetiendum esse con-  
spicio , appellere debeam, ignoro. Relucet in illo  
viua Aristidis iustitia, Themistoclis prudentia, Epa-  
minondæ fortitudo , Annibalis peritia, Iulij sapien-  
tia, Scipionis robur, Fabricij virtus : de liberalitate  
nihil ampliùs dico , ne videar assentari ; quæ tamen  
adeò nota est, vt non assentator qui eam laudet, sed  
qui non laudet maleuolus existimāndus sit. Sed quid  
externa reuoluo: cum intra parietes domesticos plu-

rima exēpla virorum illustrium habeamus; à quo-  
rum ipse virtutibus, ne latum quidē vnguem aber-  
rasse cupit, & semper cogitat. Nonné in illo residet  
Cazimiri Magni in ornando & muniendo Regno  
studium atq; diligentia, Miecislai senis grauitas, la-  
gellonis in propagando cultu Diuino labor, con-  
tentio, cura, pietas, & munificentia, in quibus ille  
nullum superiorem habet. Quid igitur iam ampliùs  
restare videtur? nisi vt hunc Principem benignissi-  
mum omni genere laudum ornemus. Hic est hic in-  
signe speculum religionis, hic excellens ornamen-  
tum literarum, hic illustre domicilium virtutum, hic  
firmissimum præsidium & tutela totius Poloniae.  
Huius consiliis saluberrimis sepe Polonia ex multis  
cladibus erepta est. Huius insigni prudentiâ innu-  
mere fraudes & doli Tartarorum sunt detecti. Hu-  
ius ineffabili munificentia, Volinia nunc Scythis est  
formidabilis. Huius maximis beneficiis Polonia est  
condecorata. Huius eximiae virtutes per ora omni-  
um gentium volitant, & pietas, quæ est fundamen-  
tum virtutū, omnibus ad imitandum proponitur.  
Viue igitur diu, viue felicissime Princeps, viue Ne-  
storeos annos. Annuat votis tuis Deus Optimus  
Maximus, vt semper auxilio egenis, incremento li-  
teris, exemplo iunioribus, terrori hostibus, patriæq;  
carissimæ ornamento sis. Annuat Deus vt tua bene-  
ficientia, & liberalitas in literatos viros, indies magis  
magisq;

magisq; augeatur atq; crescat. Seruet te Deus omni-  
potens in multa secula; vt Ecclesiæ ipsius emolu-  
mento, pauperibus fructui, fidelibus præsidio, fidei 24  
& religioni honori perpetuò esse possis: donet tibi  
prolem, quæ sit tuorum consiliorum atque virtu-  
tum particeps, mihi toti; Poloniæ commodo. Ego  
autem pro tot & tantis beneficiis, quæ mihi sunt  
præstita: cum ea nusquam, ne dicam remunerari,  
sed ne enarrare quidem valeam: omnibus tamen  
diebus vitæ meæ passim circumferam, & palàm præ-  
meferam, nunquam me tibi satis facere posse. Sed  
vt te Deus ter Optimus Maximus, in annos quàm  
plurimos saluū ac incolumem seruet, noctes diesq;  
maiestatem Diuinam interpellare, meis indignis  
precibus non desistam. Tu modò vt mea stu-  
dia, quibus me totum deuoui, proroges  
& augeas, etiam atque etiam  
humillimè peto.





1  
2  
3  
4  
5  
6  
7  
8  
9  
10  
11  
12  
13  
14  
15  
16  
17  
18  
19  
20  
21  
22  
23  
24  
25  
26  
27  
28  
29  
30  
31  
32  
33  
34  
35  
36  
37  
38  
39  
40  
41  
42  
43  
44  
45  
46  
47  
48  
49  
50  
51  
52  
53  
54  
55  
56  
57  
58  
59  
60  
61  
62  
63  
64  
65  
66  
67  
68  
69  
70  
71  
72  
73  
74  
75  
76  
77  
78  
79  
80  
81  
82  
83  
84  
85  
86  
87  
88  
89  
90  
91  
92  
93  
94  
95  
96  
97  
98  
99  
100

Ms. 1. 5.





